



王湘綺先生錄祺祥故事



恭忠王母。文宗慈母也。全太后以託康慈貴妃。貴妃舍其子而乳文宗。故與王如親昆弟。卽位之日。卽命王入軍機。恩禮有加。而冊貴妃爲太貴妃。王心慊焉。頻以宜尊號太后爲言。上默不應。會太妃疾。王日省視。帝亦省視。一日太妃寢未覺。上問安。至宮監將告。上搖手令勿驚。妃見牀前影。以爲恭王。卽問曰。汝何尙在此。我所有盡與汝矣。他性情不易知。勿生嫌疑也。帝知其誤。卽呼額娘。太妃覺焉。回面一視。仍向內臥不言。自此始有猜。而王不知也。又一日。上問安入。遇恭王自內而出。上問病如何。王跪泣。言已篤。意待封號以瞑。上但曰。哦哦。王至軍機。遂傳旨。令具冊禮。所司以禮請。上不肯卻奏。依而上尊號。遂愠王。令出軍機。入上書房。而減殺太后喪

儀。皆稱遺詔減損之。自此遠王同諸王矣。庚申之難。令王留守。至熱河。帝疾。獨軍機諸臣在。王及醇王皆不侍。八月初。王具奏請省侍。帝疾篤。已不能坐起。強起倚枕。手批王奏曰。相見徒增傷感。不必來觀。其猜防如此。故肅順擬遺詔。亦緣上意。不召王與顧命也。肅順本鄭王府。以功世爲親王。與襲鄭王異母。以才敏得主知。自輔國將軍爲戶部尙書。入軍機。專斷不讓。怡王卽世宗弟。亦以寵世王。襲王載垣。與襲鄭王端華。皆倚肅順爲用。初詔謁陵出都。實避夷兵。而諱其行。行日之朝。猶有詔言君死社稷。獨肅先具行裝。備路齎。自都啓行。供張無辦。后妃不得食。惟以豆乳充飯。而肅順有食擔。供御酒肉。后御食有膳房。外臣不敢私進。孝貞孝欽兩后不知

35218

其由。以此切齒於肅順。及至熱河。循例進膳。孝貞又言流離羈旅。何用看席。請蠲之。文宗曰。汝言是也。當以告肅六。明日詔問云云。肅順知上旨。則對以費無幾。若驟減膳。反令外驚疑。上心喜所對。即詔后曰。肅六云不可。后益惡肅順矣。已而大行。遺詔入臣受顧命如故事。孝貞詔顧命臣。以防壅閣爲辭。日進章疏。仍由內發。軍機擬旨。上后覽發。以小印爲記。小印曰同道堂。不知何時人刻。漢玉爲之。漢玉者。含玉也。殉葬玉。皆假名漢。文宗初晏朝。后至御寢。問侍寢何人。升坐責數之。上既視朝。心念后未還。恐有變。即還寢。則宮監森然侍立。知后升坐。即戒無報知皇后。潛步入。則后方上坐。侍妃跪前。后見上至下迎。帝即坐后坐。跪者猶未敢起。后立帝傍。帝陽指跪者問后。此何人也。后跪奏自祖宗以來。寢興有定法。今帝以醉過辰。不出朝。外間不知。皆以奴無教。故責問彼。何以多勸上酒。帝笑曰。此自我過。彼何能勸我。且宜恕之。后奉詔因曰。此主子宥汝。以後無論何處醉。

唯汝是問。帝慚。即索所佩。唯一玉印。解賜后以謝。同道章自此始。今乃以爲信。而或說不知。安有傳僞云。既而御史高廷祜上請垂簾。本后意也。以示顧命臣。肅順即言按祖制。當立斬。孝貞心忤焉。即曰。我輩不用其言足矣。不必深求。及票擬上議。斬奏下。獨留高摺不發。於是軍機三日不視事。孝貞問。則對以前摺未盡下。於是孝貞涕泣。自起檢奏與之。擬高謫爲披甲奴。越日大臨。后見醇王福晉而泣。醇王福晉。孝欽妹也。孝貞亦妹之。故相親善。訴其事曰。欺我至此。我家獨無人在乎。福晉言七耶在此。孝貞喜曰。可令明晨入見。及明。醇王入直廬前。順訪問何爲。對以召見。肅順晒曰。焉有此。斥令退。王退。立外階。俄宮監來窺直房。旋去。而軍機至晏。竟不叫起。叫起者。召見分班。一見爲一起。軍機則皆同入。爲頭起。此日不召頭起。先召醇王。宮監來窺者三。終不見醇王。至三。乃自語曰。七耶何不來。王在外聞之。即應曰。待久矣。來監亦曰。待久矣。遂引王入。肅順在內坐。不能

阻。王既對。孝貞訴如前。醇王言此非恭王不辦。后卽令往召恭王。醇王受命。馳還京。三日。與恭王至軍機前輩也。至則遞牌入謁梓宮。因見后。后訴如前。恭王對非還京不可。后曰。奈外國何。王奏外國無異議。如有難。唯奴才是問。后卽令王傳旨回鑾。令肅順護梓宮繼發。既至京。卽發詔罪狀顧命八臣。俱拏問。怡鄭二王猶在直房。恭王出詔示之。皆相顧無語。王問遵旨否。載垣曰。焉有不遵。王卽拱之出。則已備車送宗人府。於是遣醇王迎提肅順。卽廬殿旁。執詣刑部。肅順罵曰。坐被人算計。乃以累我。臨刑罵不絕。卒以攔阻垂簾斬於市。而賜二王死。一時無識者謂之三凶。卽詔旨亦不知垂簾之當斬也。先是改元祺祥。至是改同治。設三御坐。召見聽政如常儀。名治肅黨。以常酒食往來者當之。而恭王之任事。委權督撫。朝政號爲清明。頗采外論。擢用賢才。能特達者。不爲遙制。然宮監婪索。親王密邇。時有交接。輒加犒賚。則不足於用。而國制王貝勒不親出納。俸給莊產。皆有

與主者率盜侵以自給。及入樞。廷需索尤繁。王恆憂之。福晉父故總督也。頗習外事。則以提門包爲充用常例。王試行之。而財足用。於是府中賄賂公行。珍貨猥積。流言頗聞。福晉亦患之。而不能止矣。王旣被親用。每日朝輒立談移晷。宮監進茗飲。兩宮必曰。給六耶茶。一日召對頗久。王立御案前。舉甌將飲。忽悟此御茶也。仍還置故處。兩宮哂焉。蓋是日偶忘命茶。而孝欽御前監小安方有寵。多所宣索。王戒以國方艱難。宮中不宜求取。小安不服曰。所取爲何。王一時不能答。卽曰。如瓷器杯盤。照例每月供一分。計存者已不少。何以更索。小安曰。往後不取矣。明日進膳。則悉屏御瓷。盡用村店粗惡者。孝欽訝問。以六耶責言對。孝欽愠曰。乃約束及我日食耶。於時蔡御史聞之。疏劾王貪恣。他日詔王曰。有人劾汝。示以奏。王不謝。固問何人。孝欽言蔡壽祺。王失聲曰。蔡壽祺非好人。於是后積前事。遂發怒。罪狀恭親王。有曖昧不明難深述之語。朝論大驚疑。而外國使臣亦詢軍

35220
機諸臣事所由。用是得解。復召見王。痛哭謝罪。復直如初。以疑忌擠去者八人。軍機有前後八仙。與前顧命者爲對。皆以目恭王云。然恭王自是益謹。而安得海以擅出京師。誅於歷城。李聯英繼用事。烜赫過於小安。而謹飭慎密。竟終事孝欽。恭王亦以功名終。得諡曰賢。不遇禍敗。然王大臣納賄之風。及孝欽頗留意進獻。皆自王倡之。五十年來。議和主戰。終歸於服從。亦孝欽之過慮。

也。恭王孝欽。皆有過人之敏智。而俱爲財累。乃至德宗末年。天下惟論財貨。及禪讓亦以賄成。用兵惟先言餉。動至千百萬。和款外債。遂鉅兆。舉古今不聞之說。公言之而不忤。開闢以來。未有之奇。蓋又咸同以來所不料者。以前史論之。戰國秦楚之際。庶幾肇茲。自非張四維。革澆風。吾烏知其所底哉。

上海商務印書館發行

拳術學教範 一冊 八角

海門陸師凱先生。素精拳術。歷任軍警要職。極負時名。是書第一二編。即先生遺著。第三四編。係先生之胞弟師道君所著。教程教法。均極詳備。插圖有四百四十餘幅之多。張公鑒題爲拳術學教範。黃公炎培題爲中國之武士道。其價值可知矣。用爲中學校師範學校高等小學校。以及軍警教練個人體育之用。極爲合宜。即國民學校。用以參酌教授。亦無不可。